




四川大學古籍整理研究所編

儒藏

史部
第一六六冊

四川大學出版社



四川大學古籍整理研究所 編

儒藏·史部

儒林史傳

第六十六冊

四川大學出版社 二〇〇八年

國家「211工程」重點學科建設項目

國家「985工程」創新基地規劃項目

中國孔子基金會重大項目

目錄

皖學編續	清·徐定文 編纂		一
吳郡名賢圖傳贊	清·顧沅 輯		五五七



先儒朱韋齋先生

先生名松、字喬年、別號韋齋、徽州婺源人。以宋哲宗紹聖四年閏二月二十三日生於婺源居第。父承事郎森、字良材、嘗曰、吾家業儒、積德五世、後世必有顯者。先生生有俊才、童時已出語驚人、未冠由郡學貢京師。徽宗重和元年中進士第、始放意於詩文、其詩不事雕飾、天然秀發、格力閑暇、超然有出塵之趣、遠近傳誦。至聞京師、其文汪洋浩瀚、不見涯涘、如川之方至、奔騰千里、傾刻萬變、人罕能及。然先生未嘗自是、恐其去道愈遠、則又讀經史百家書、求天下國家興亡理亂之故、與夫一時所以應時合變先後



本末之序期^①有以發爲論議措之事業如賈長沙陸宣公者及從羅仲素從彥蕭子莊覬游與李愿中侗劉致中勉之劉彥冲子翬胡原仲憲爲友聞龜山楊氏傳河洛之學獨得古先聖賢不傳之遺意於是愈自克勵痛刮浮華以趨本實日誦大學中庸以用力於致知誠意自謂性卞急害道因取古人佩韋之義名其齋以自警飭由是向之所得於觀考者益有以自信而守之愈堅故嘗稱曰士之所志其分在義利之間而已宣和五年銓授迪功郎建州政和縣尉七年丁父憂高宗建炎二年服除調南劍尤溪縣尉監泉州石井鎮紹興四年以御史胡世將泉州守謝克



家薦得召試、問中興事業之難易先後、先生對以順人心、任賢才、正綱紀、累數千言、辨論精博。帝覽而異焉、除秘書省正字。趙忠簡公鼎以元樞都督川陝荆襄軍馬、欲奏取先生爲屬、會丁母程氏憂、築建州城南環溪精舍、遷居焉。七年、上丞相李忠定公綱書曰、父子主恩、君臣主敬、是爲天下之大義、無所逃於天地之間。如人食息呼吸於元氣之中、一息之不屬理、必至於斃。昔孔明、王鐸皆當王室之衰、各能有所成就、世徒見其功烈之盛、謀謨之偉、而莫知大本之所在、在於倡君臣之義、以立士大夫殉國死難之節。今相公當宗廟社稷危疑之際、諸所建白、皆國家安危

大計、至今焯然在人耳目。使天下之善類有戮力王室之志者、皆以爲歸、非深明先王維持天下之道、與孔孟所丁寧深切者、其孰能至於斯。服除、改左宣教郎、除祕書省校書郎。時帝已用張忠獻公浚之策、進次建康、指授諸將計日大舉、以復中原、國勢亦少振矣。先生欲堅帝意、以遂中興之業、因論自古中興之君、惟漢光武勤勞不怠、身濟大業、可以爲法。晉元帝、唐肅宗志趣卑近、功烈不終、可以爲戒。反覆切至。而又慮士溺於俗學、不明君臣之大義、處成敗之間者、嘗有苟且自恕之心、而乏舍生取義之節、將使三綱淪墜、而有國家者無所恃以爲安。又奏宜鑒既往之



失、深以明人倫、勵名節爲先務。又博求魁磊骨鯁沈正不
同之士、置之朝廷、使平居無事、正色立朝、則姦萌逆節銷
伏於冥冥之中。一有緩急、則奮不顧身、以抗大難、亦足以
禦危凌暴侮、庶幾神器莫安而基祚強固矣。帝善其言。八
年、遷著作佐郎。御史中丞常同薦先生可任大事、復賜對、
卽抗言、當今國論不過兩端、喜進取之謀者卽失之疏、爲
待時之說者又失於媮。惟自治觀釁最爲上策。願陛下並
進忠賢、修明紀律、革姑息、振國勢、金不足平也。帝悅、擢尙
書度支員外郎兼史館校勘。與修哲宗實錄、分宣仁附傳、
蔡卞所撰也。先生辨明誣謗、分別邪正、考訂精密、直筆無

隱論者美焉。歷遷司勳吏部兩曹，皆領史職如故。以史勞轉奉議郎，以年勞轉承議郎。又慮二三大將握重兵，恐有尾大之患，請復武舉，責實用，必其洞曉韜鈴，長於綏御者，以儲將帥之才。下州郡選驍勇，悉送行在，以輔周衛之缺。精擇帥守，使蒐卒乘以壯藩維之勢。又請建太學，明人倫，以倡節義之風，勵荀媼之習。既而金人講和，秦檜決議許之。先生與史館同列，上章曰：陛下以梓宮母兄，天屬未歸，不憚屈已和戎，曾不思項羽尙置太公於俎上，而約高祖以降，使爲高祖者信其詐謀而遽爲之屈，則自身且無處所，何太公之可還。惟其不信不屈，日夜思所以圖楚，以故



卒能蹙羽於鴻溝之上、使其兵疲食盡、而太公自歸。此今日之龜鑑也。忤秦檜意、諷御史論先生懷異自賢、出知饒州。未上、請祠、得主管台州崇道觀。日以討尋舊學爲事、玩心於義理之微、放意於塵垢之外、有以自樂澹如也。性孝友、與人交重然諾、不以窮達死生二其心。接引後進、教誘不怠、聞人之善、推獎如不及。至邪佞鄙瑣簡賢附勢之徒、與己異趣者、則惡而遠之。施於吏治、亦能果決明辨、扶正抑邪、無所顧避。文章節行、皆可爲後世師。學者稱韋齋先生。年四十七卒於建州水南環溪精舍。時紹興十三年三月二十四日也。贈通議大夫。再遷葬於崇安縣上梅里寂

歷山中峯寺之北。所著韋齋集十二卷。論者謂有大中而後有二程。有韋齋而後有朱子。道學之傳。蓋有自也。元順帝至正二十二年諡獻靖。贈齊國公。明世宗嘉靖九年。從祀崇聖祠。稱先儒朱氏。

韋齋文集贊曰。游心高明。默契道體。尙友古今。以開後裔。乃聖乃神。丕顯丕烈。太極爲公。一源不竭。

先儒贊曰。徽國之儒。則有心傳。屬子三友。父有訓焉。

聖門人物志贊曰。早挾才思。尋酣道腴。追踪河洛。抗直權輿。授子三友。爲世大儒。標美父鵠。蔚然華萼。

定文謹按。先生因性卞急。以韋名其齋。又以爲字。誠以

克已乃能復禮、孔顏之眞傳也。且親師取友、日誦大學中庸、以用力於致知誠意、不但啟朱子集諸儒大成之緒、而徽之理學風氣、亦先生開其先、厥功豈不偉哉。至集中奏疏、並上李忠定公書、

聖祖仁皇帝稱其直言無隱、深中南宋時弊。名儒心迹、曠代益昭已。

皖學編卷首中終



校記

- ①「期」下，據《宋名臣言行錄》外集卷一一，有「於」字，當補。
- ②危凌暴侮：據右引書，當作「危辱凌暴之侮」。

先賢朱子

朱子名熹字元晦一字仲晦晚號遯翁章齋先生子也。以宋高宗建炎四年九月十五日生於延平府尤溪縣鄭氏宅。幼穎悟端重甫能言父指天示之曰天也。卽問天之上何物父異之初就傳授以孝經一閱題其上曰不若是非人也。嘗從羣兒戲沙上獨端坐以指畫沙視之八卦也。年十歲慨然有求道之志。舉子業初不經意讀孟子聖人與我同類句喜不自勝以爲聖人亦易爲。十四丁父憂遵父遺命稟學於籍溪胡憲白水劉勉之屏山劉子翬三先生門。白水以女許妻屏山告以入道次第曰吾於易得入德



之門。所謂不遠復者。乃吾之三字符也。因字以元晦。祝云。木晦於根。春夏華榮。人晦於身。神明內腴。朱子後以元爲四德之首。不敢當。乃改仲晦。晚年猶書門符曰。佩韋遵考訓。晦木謹師傳。紹興十七年。年十八。貢於鄉。考官蔡茲語人曰。吾取中一後生。三策皆欲爲朝廷措置大事。他日必非常人。次年登進士第。授左迪功郎。泉州同安縣主簿。未赴。聞延平李先生侗學於羅仲素先生。得伊洛正傳。且父同門友也。素推重。不遠數百里。徒步往從之。初見。縱談千古英銳之氣。溢於眉宇。延平令靜坐三日。自是收斂身心。折旋中矩。延平稱之曰。樂善好義。鮮有倫比。又曰。穎異絕



人力行可畏。所論難皆體認切至。從游累年。其學益就平實。二十三年秋。至同安任。蒞事勤敏。纖悉必親。苟利於民。不憚其勞。選邑秀民充弟子員。日與講說。修己治人之道。又建經史閣。藏書二百餘卷。便學者觀覽。參取周禮儀禮。開元禮。身率諸生肄行之。勵以誠敬。開以義理。皆竦然尊師之。又禁女婦之爲僧道者。當路敬憚。至不以屬禮待。秩滿罷歸。請祠。監潭州南嶽廟。以養親。講學爲事。同安士思其教。民懷其惠。相與立祠學宮。以輔臣陳康伯薦。召赴闕。會言路有託抑奔競以沮之者。以疾辭。孝宗卽位。詔求直言。朱子上封事。首言聖躬雖未有過失。而帝王之學。不可